

**Delegat Krunoslav Vrdoljak** postavio je tri pitanja Vijeću ministara BiH, koja glase:

„U svakoj državi postoje tri sektora u kojima se mora postići ili maksimalno težiti potpunoj nezavisnosti: proizvodnja hrane, finansije i energetski sektor. Kod energetskog sektora, a zbog sporih reakcija nadležnih, zavisnost postaje sve veća. S druge strane, jalove i opširne rasprave političkih moćnika mnoge dobre ideje blokiraju u začetku, bez ozbiljnih stručnih analiza i značajnijeg uključivanja javnosti prilikom donošenja odluka.

Trenutno najaktuelniji problem iz energetskog sektora su Gornji horizonti, gdje je očigledno da struka, javnost i politika imaju potpuno suprotstavljene stavove. Republika Srpska ima čvrstu namjeru da izgradi Hidroelektranu 'Dabar' u Dabarskom polju, što podrazumijeva prevođenje voda iz Gornjih u Donje horizonte, ali uz istovremeno prevođenje voda iz jednog riječnog sliva u drugi, što je veoma osjetljivo s aspekta zaštite okoliša i prirode, te iz tog razloga regulirano zakonima iz oblasti zaštite okoliša i voda u oba bh. entiteta, a i u međunarodnoj zajednici. Očigledno je da se mnogi propisi nastoje zaobići. Poznato mi je da su nadležna ministarstva iz Federacije BiH pokušavala upozoriti Vijeće ministara, te Vladu Republike Srpske da izgradnja tunela prema Fatničkom polju bez zakonom propisane procjene uticaja na okoliš, odnosno obavezne studije procjene uticaja na okoliš, kao i bez novih istraživanja i monitoringa voda ovog osjetljivog krškog područja ne upućuje na činjenicu kako bi projekat mogao imati obostranu i višenamjensku korist u prevođenju voda iz Gornjih u Donje horizonte. Očigledno je da komunikacija nije na zavidnom nivou. Nastavkom realizacije ovog projekta bez spomenutih analiza dio struke ocjenjuje se katastrofalnim. Neki idu toliko daleko da tvrde kako će flora i fauna biti potpuno uništena uz Neretvu do Počitelja. Njima se pridružuju i neke nevladine organizacije, a cijenim da će se problem o ovome multiplicirati, a najozbiljnije upozorenje došlo je od Svjetskog fonda za zaštitu prirode (WWF) koji je svojom *Studijom uticaja projekta HE 'Dabar' na okoliš* ozbiljno upozorio na probleme.

1. Da li je Vijeće ministara BiH preko Ministarstva vanjske trgovine i ekonomskih odnosa BiH, odnosno Odjeljenja za okoliš koje se nalazi u sastavu ovog ministarstva upoznato s ovim projektom?
2. Da li je ijedno nadležno tijelo na državnom nivou dalo ikakvu ocjenu Projekta?
3. Ako nije, da li Vijeće ministara ima namjeru preduzeti ikakve aktivnosti kojim bi se definirao status projekta Gornji horizonti u smislu njegove ekonomske isplativosti i štetnosti po okoliš, posebno u slivu i delti rijeke Neretve?“

Nakon upućenih delegatskih pitanja, predsjedavajući Doma naroda pozvao je delegate da se izjave o zaključku koji je predložio delegat Krstan Simić, da se entitetskim parlamentima, Vijeću ministara BiH i Visokom sudskom i tužilačkom vijeću BiH dostavi odgovor na delegatsko pitanje Krstana Simića, postavljeno na 19. sjednici Doma naroda Parlamentarne skupštine BiH, 19.7.2012.